

Weinviertl mocht Sinn

Weiviertel, des is für mi „daham“

Ich liebe jedn anzln Bam

A jede Weingatzeln und Traubn

In Kobö* duat mit seine Taubn

(Ein Taubenhaus aus Holz auf einer Säule)

De oidn Säun vud Bauernheisa

De Sonnenblumen unsre Paradeisa

De Küabis alla scho wia de bliahn

Wos fia Foab de Bliah do kriagn

De Köllagwöb so wundaschee

I siach in Köllazegan* steh

(Tragebehältnis massivem Leder für 2x2Literflaschen)

Wia si de Föda dribalegn

des muasst da ollas amoi gebn

De Hosn, und de Rudln Reh

Bussar und Foikn in da he

Des Frühschopfn de Musikanten

Des Fluchtochtl mit an Sekantn

Köllagossna ibaroi

Mochts de Augn auf schauts amoi

Und net nua fia unsre Kipfla* (weinviertlerisch Augen)

Schmankerln vü bessä wia a Pizza

Blunzngrestl, Bratlfettn

waunn mia net unsa Schnitzl hättn

Fleischlaberln und Schinknfleckaln

Nix Fisch vu irgndwo, wüsst mi heckaln

Des Sunntogshendl mit grean Salat

des hot a glicklichs Leben ghobt

An Lebakas ok i wass

für Vegetarier ka Spass

Oba de brauchn a net Leidn

Schneits eich an Küabis auf an gscheitn

Karottn, Zölla und Radieschen

Rinnt scho da Drenzaling a bisschen?

Äpfö Birn und unsre Nuss

für de Bocharei ein Muss

Vanillekipfaln Sachatuatn

zum oweschwam an Soft an guatn

Sovü gabs no zum schreim fias Gschmackl

dass i bis ibamuagn no hackl

Nochdem ma gsehng und gschmeckt scho haum

Kummt jetztta unsa Nosn draun
Waunst Augn zuamochst und des ois riachst.
Geht's Weiviertel durch deining Körpa, siachst?
I riach in Raps, a frische Erdn,
an Sturm des is da Wein beim Werdn.
Waunst im Woid stehst otmest ei
Daun riachst wia sche kauns Lebn sei
und gspian kaun ma des gaunze a
An Pfescha wia wauna aus an Saumt goa wa.
Und weu ma jetzt scho d Augn zua haum
samma jetzt gaunz leise daun
wosd do ois hean kaunst glaubast net
Vogaln zwitschan, an Specht der peckt

A Pardies auf Gottes Erdn
und trotzdem tan si vü beschwern
des vasteht ma jetzt vielleicht net glei
oba unsa Sudarei
gheat zua Weiviertla Kultur
z hass, z koit und grent hots a net gnua
I wü nua sogn, so woah i bin.
S Weiviertel, is mei sechster Sinn